

MME EKIKERE OWO ABASI

Ñwed Mbon Philippi 4:8

ỌYỌHỌ UKPEP-ÑKPỌ 341

Eke Ikpọ Owo

IKỌ IBUOT: “(Koro ñkpọ-ekọñ, eke idade iñwana ekọñ, idighe ñkpọ-ekọñ obukidem, edi se ikopde idem ke enyin Abasi ndiwuri mkpọsọñ ebiet); nnyin iwuri ekikere esit owo, ye kpukpru edikoñ ñkpọ eke emenerede idem ke enyọñ eñwana ye ifiọk Abasi; inyuñ imum kpukpru ekikere nte mbuot-ekọñ, inam mmọ esuk ibuot enọ Christ” (2 Ñwed Corinth 10:4, 5).

I Mme Akpan-Ñkpọ Ke Edu-uwem Owo Abasi

- 1 Paul abat ọnọ ndisana nditọ Abasi emi edude ke Philippi nti ñkpọ eke edotde anditiene-Christ ndida ndu uwem erikan, Ñwed Mbon Philippi 4:8
- 2 Yom ofuri akpanikọ emi odude ke Jesus Christ, ekedi item emi Paul ọkọnọde ndisana nditọ Abasi, Ñwed Mbon Philippi 4:8; Matthew 22:16; John 7:18; 14:6; 1:14, 17; 1 John 5:6, 20
- 3 Edinam akpanikọ ke kpukpru ñkpọ edi ata akpan ñkpọ ke uwem anditiene-Christ, Ñwed Mbon Philippi 4:8; Utom Mme Apostle 6:3; Ñwed Mbon Rome 12:17; 13:13; 2 Ñwed Corinth 8:21; 13:7; 1 Ñwed Thessalonica 4:12
- 4 Edinam unen ye eti ubiere-ikpe edi se ekpetimde ekere enyuñ enọde eti idaha ke uwem mme owo, Ñwed Mbon Philippi 4:8; Genesis 18:19; Deuteronomy 16:19, 20; 2 Samuel 23:3; Psalm 82:3; Mme Ñke 11:1; Matthew 23:23
- 5 Nditọ Abasi enyene nditim mkpeme mme ñkpọ eke edide edisana, Ñwed Mbon Philippi 4:8; 1 Ñwed Timothy 4:12; James 1:27; 3:17; 2 Peter 3:1; 1 John 3:3
- 6 Akpana ekere ebaña ñkpọ eke odotde ete ema, Ñwed Mbon Philippi 4:8; 2 Samuel 1:23; Ikwọ Solomon 5:16; Mark 10:21; John 11:36
- 7 Nditọ Abasi ekpena enyene udọñ enyuñ eyom ndiwọrọ eti etop, Ñwed Mbon Philippi 4:8; Utom Mme Apostle 6:3 10:22; 22:12; 1 Ñwed Timothy 3:7; 5:10; Mme Hebrew 11:2
- 8 Eti ido edi ata akpan ñkpọ ke ebiet ekededi eke ekutde enye, Ñwed Mbon Philippi 4:8; Ruth 3:11; Mme Ñke 12:4; 31:10; 2 Peter 1:3, 4
- 9 Ido edikpono Abasi ikemeke ndiyọhọ edieke esiode itoro Abasi efep, Ñwed Mbon Philippi 4:8; 1:10, 11; Psalm 33:1; 50:23; Matthew 21:16; Ñwed Mbon Ephesus 1:6; Mme Hebrew 13:15.

SE EKPEPDE EBAÑA

Ekere Mme Ñkpọ Emi

Isọñ ukpep-ñkpọ emi odude ke itie edikot emi nnyin inyenede edi item ọnọ nditọ Abasi ete “ekere”; enyuñ ekere ebaña mme ukpep-ñkpọ itiaita, emi edide: akpanikọ, ukpono, unen, edisana uwem, ñkpọ eke odotde ete ema, eti etop, eti ido, ye itoro. Ekikere esit edi inua-otop ọnọ ukpọñ, ndien mme akwa asua owo ita emi edide ererimbot, obukidem, ye satan etim efiọk ete edieke ekemedede ndinam esit owo ekere idiọk, ukpọñ esie eyeduọ ke ini idomo. Eneñere ekut uwut-ñkpọ emi ke ererimbot mfin ke akwa ifik emi mmọ emi enyenede ukara-idem emi baba owo ndomo kiet minyeneke ñkpọ inọ idemesie (Communist) esinde ke ndisuan ukwañ ukpep-ñkpọ mmọ ete ke Abasi iduhe.

Uwut-ñkpọ efep edi nte mme asuan-etop eyo emi eñwanade ke ofuri usuñ nte ekekeme, nditiñ nsọñ nyire ke ndimenere mme ñkpọ urua ñwut man ebe oduk ke esit owo. Mme usiak-ifia emi enamde ufiop mmin ye sika ebiet ata ediwak okuk kpukpru isua ke ndisuan etop ñwut mme owo ufọn eke odude ke mme ñkpọ urua mmọ. Usiak-ifia sika ema enyam ata ediwak sika ke isua kiet oto ke ndibiat ediwak okuk ndinam iban etim efiọk ete ke ọfọn ndiñwọñ sika.

Mme ebiet emi enyamde n̄wed-mbuk eyo mfin eyoḥo ye mme n̄wed eke abiatde eti edu uwem. N̄kpri nditọ edu ke idomo ke ofuri idaha oto nte mme usiak-ifia emi misaṅake ke item enamde n̄kpọ urua mmọ anyama, edi ikereke ibaṅa idiok-n̄kpọ emi otode utọ edinam oro. O, mme ete ye eka emi efiokde Abasi ekpekam ekpeme mme n̄wed emi nditọ mmọ ekotde, ekpenyuṅ ebok enyuṅ ekpeme ekikere mmọ ke usen ke usen ke ndikot N̄wed Abasi nnọ mmọ.

Anditiene-Christ inaha enyene ndik ete ke N̄wed Abasi imọ akabare akani, inyuṅ ikemeke aba ndisaṅa n̄kekem ye mme n̄kpọ eyo emi. Andiwet n̄wed Abasi edi Abasi, Enye oyohọ ye odudu. Tōsin isua etie nte usen kiet ọnọ Enye. Ikọ Abasi inyeneke ibat isua, enye ekem onyuṅ ada owo Abasi usuṅ ndidu uwem eke ọfonde ke eyo emi kpa nte ekedide ke akpa. Item emi Paul ọkọnọde nti ikot Abasi ke Philippi ete “ekere mme n̄kpọ oro” osuk enyenyene ufọn kpa nte ekedide.

Mme usen Paul ekeworo idiok etop ke abaṅa ediyom inemesit otime-otime, ye idiok-n̄kpọ. Edi akpanikọ ete ke ediwak n̄kpọ ema edu ndidomo anditiene-Christ emi okodude ke eyo Paul kpa nte onyuṅ edide ke ofuri emana. Ke ntọṅo eyo mme anditiene-Christ, mme n̄kpọ emi edade eyom inemesit, emi edude ke eyo emi nte ekebe-ndise, ekebe utiṅ-ikọ ye ufok uwut-ndise, ikoduhe, edi ifet ama osuk odu ndikomọ ke idiok-n̄kpọ. Owo ekededi eke ekpepe n̄kpọ abaṅa mbuk eset ọfiok udomo idaha idiok-n̄kpọ ye ibak emi ekekade iso edu ke eyo mme Mbete nte ido emi emehede ke esit. Nso ke eketeme ikot Abasi ke eyo oro ete enam ndida mbiṅṅo mme n̄kpọ eke etiede ntre? Ekere ebaṅa mme n̄kpọ Abasi, ye mme n̄kpọ oro eke edide edisana enyuṅ efonde!

Inenke ndikere ete ke anditiene-Christ ekeme ndikomọ ke mme nsio-nsio ekikere emi ọbiṅṅode ye Spirit Abasi ye mme n̄kpọ Abasi ndien nnen-nnen ido ukpono Abasi osuk odu ke esit esie. “Koro enye etiede kpa nte ekerede ke esit esie” (Mme N̄ke 23:7). Owo kiet ama etiṅ ete “owo idifonke ikan mme n̄wed emi enye okotde.” Akpan-akpan N̄wed kiet kpọt odu ọnọ anditiene-Christ, oro edi N̄wed Abasi. Edieke owo edinamde akpanikọ ke ndikot nnyuṅ n̄kere ikọ Abasi ke usen ke usen, oro eyemenere onyuṅ ọbok ekikere ye ukpọn esie. N̄wed Abasi edi n̄wed emi okponde akan ke otu mme n̄wed emi eyakde esin mme owo ke ubok. Enye odu ke nsinsi; onyuṅ oyohọ ye kpukpru ukpep-n̄kpọ ke abaṅa nti edu-uwem. Enye edi andiyarare Abasi ye edinen ido Esie, enye onyuṅ edi n̄kukure odudu emi etemede owo eti usuṅ ndidu uwem. Ke eyo mfin emi uyo tōsin duop efioride ndiduri owo nsin ke idiok-n̄kpọ. N̄wed Abasi osuk ọsọsọṅ ada, okoṅ nte ikpọ obot, onyuṅ ofiori nte uyo obuma ete ke usuṅ Abasi enen. Kpa nte itie edikot nnyin etemede, anditiene-Christ enyene ndiyak ofuri ekikere nnọ ke ndikere mme n̄kpọ Abasi.

Eti Ye Idiok

Ifiok idiok-n̄kpọ emi anam-idiok enyenede oto ke ndinam idiok edi ubet ekikere emi onyuṅ ekemede ndikabare ndi ata idiok asua esie ke ini enye ama akakabare esit. Erinyaṅa ukpọn edi enọ Abasi, oto ke mfọn Abasi esioṅo mme owo ke mme idiok-n̄kpọ mmọ enyuṅ enam mmọ esana oto ke Iyip Christ. Okposuk edi edide ntre, man owo ekeme ndisoṅo nda ke erinyaṅa emi enye ọbode oto Abasi, enye enyene ndika iso nsin ifik. Ifonke anditiene-Christ ndiyo nsaṅa ifu-ifu ke uwem, edi isinke ifik ke ndinam Spirit Abasi ọkọri ke esit esie. Edisana owo kiet ke mme isua emi ekebede ama etiṅ abaṅa ufọn ndinam erinyaṅa nnyin ọworo ada oto ke ntiṅ enyin “Idighe nti ifiop-esit, mme ini ntọtunọ ekikere mbaṅa ntaṅ-ndok ye ebuana ọtọ kiet ekeme ndida itie ọkpọsọn utom ye nsin-ifik emi ọnọde erikan ke kpukpru n̄kpọ eken, emi onyuṅ akande, kpa oro n̄ko onyuṅ ọnọ erikan ke enye emi.”

Eve ndinyime idiok-n̄kpọ emi andidiok ekemende owut enye ndinam akada iduọ ọnọ owo. Ndikpaṅ utọn nnọ mme ekikere emi otode Satan ada ikpat kiet ọkpọn ukem idiok-n̄kpọ oro. “Tim kpeme esit fo kan kpukpru se ekpemedede; koro uwem otode enye” idighe ikpikpu ntọt. Ọkwooro-ikọ ama etiṅ ete, “Afo eyekpeme enye ke emem-emem: koro enye ọbuotde idem esie ye afo” (Isaiah 26:3).

Ekpenyene nditi ete ke ndiyak ndiọ ekikere oyohọ ke esit eyebiom nnyin ikpe ke iso Abasi nte mme anam-idiok. Emi ekedi ubiom-ikpe mmọ emi ekebemede ukwọ iso edu, anam “Jehovah okut idiok-n̄kpọ owo nte okponde ke isoṅ, kpukpru n̄kpọ ke ekikere esit esie enyuṅ esuk edi idiok kpukpru ini” (Genesis 6:5). (Kot ke Deuteronomy 29:19, 20; Matthew 15:19). Abasi ama etiṅ abaṅa Israel ete ke Imọ iyeda idiok-n̄kpọ itiene mmọ, kpa mfri ekikere mmọ, koro mmọ esinde mbet Esie (Jeremiah 6:19). N̄ko, Abasi ama obiom Israel ikpe ke mmọ ndisaṅa ke itun esit mmọ (Jeremiah 9:14). Spirit Abasi ama emen Ezekiel

owut idiok-ñkpọ Israel nte mmọ edipde idiok-ñkpọ ke ubet esit mmọ (Ezekiel 8:12). Edi ata akpanikọ ete ke esit edi inua-otop ọnọ ukpọñ.

Ndikere Mbaña Abasi

Abasi ọfiok ekikere mme anam-idiok ukem nte ọfiokde ekikere ndinen owo. Eñwoño akwa edidiọñ enọ mmọ eke ekerede ebaña Enyiñ Esie. Nnyin imokot ite: “Ndien mme abak Jehovah eneme kiet ye kiet: ndien Jehovah akpañ utọñ, onyuñ okop, mmọ enyuñ ewet ñwed eriti ke iso esie enọ mme abak Jehovah ye mme ekere enyiñ esie” (Malachi 3:16).

Ke eyo unana erinim ke akpanikọ eke nnyin idude ke esit, akwa unana erinyime ọyọhọ ke uwem mme owo ndikut ufọn eke odude ndinam akpanikọ ke ọwọñ-esit, ye ñkpọ eke enende, ye ñkpọ eke asanade ye ñkpọ eke odotde ete ema. Yak edi nte ededi, iduhe ñkpọ eke añwanade ye idiok-ñkpọ, emi odobide onyuñ ọsọpde, nte edisana uwem anditiene-Christ. Ke ñwed emi ekerede “Mme Utom John Wesley” nnyin imokut nte ekikere emi ọwọrọde ada: Ke ini mbubiam ñkpọ ọtọde oduk udim-udim, onyuñ etiede nte spirit ye uwem edikpono Abasi mmọñ osop, ata eti usuñ ndiñwana ye utọ idomo oro edi mme anam-utom Abasi (oro edi kpukpru nditọ Abasi) ndiyak idem mmọ edi uwut-ñkpọ nti ido emi mme owo ekutde enyuñ ekopde ebaña, oro edi, eyak ñkañ-idem ye uwem obio Abasi emi mmọ edude owut idem, ana añwa-añwa, onyuñ ọsọñ ada ke ndisuene mme ikpikpu uwem eken.

Mme ekikere nnyin eyarade ewut se esit nnyin oyomde onyuñ akamade. Ke ebighide mme awarade nnyin iyedio ekikere oro itin ndien uwem nnyin eyedi ukem ye ekikere nnyin, koro nnyin idide se nnyin ikerede (Mme Ñke 23:7). Ke ndikere mbaña mme ñkpọ emi edinamde nnyin iwọrọ eti etop, nnyin iyeda mme ñkpọ oro inyene nte eke nnyin. Ọkpọsọñ edikere ke abaña mme ñkpọ emi eyenam mmọ ekabare edi mbak ukpọñ nnyin. Akpanikọ ye unen eyekabare oduk ke esit-esit uwem nnyin. Nnyin iyekop udọñ ibaña mme nti ido emi enyenede ukpono, emi enyuñ edemerede erinyaña ke ukpọñ nnyin. Nneme nnyin eyebaña obio-ubọñ Abasi, ebuana nnyin eyenyuñ edi ye mmọ eke enyimedede utọ ido oro. Nnyin iyenylene ebuana ye Ọbọñ, koro “Nte iba eyesaña kiet ye kiet ke mmọ midighe esit kiet?” (Amos 3:3).

“Ke akpatre item, nditọ-ete, ñkpọ ekededi eke edide akpanikọ, ye ñkpọ ekededi eke enyenede ukpono, ye ñkpọ ekededi eke enende, ye ñkpọ ekededi eke edide edisana, ye ñkpọ ekededi eke odotde ete ema, ye ñkpọ ekededi eke ọwọrọde eti etop; edieke eti ido odude ke ñkpọ, edieke itoro onyuñ odude, ekere ñkpọ oro” (Ñwed Mbon Philippi 4:8).

MME MBUME

- 1 Nso idi mme ñkpọ itiaita emi edọhọde anditiene-Christ ekere abaña?
- 2 Nso inam edide akpan ñkpọ ndikere mbaña mme ñkpọ oro?
- 3 Nso inam mme asuan-etop eyo emi edomode ofuri ukeme ndiyip esit owo?
- 4 Nso idi inua-otop inọ ukpọñ?
- 5 Nte imekeme ndidi ñkpọ kiet ke esit nnyin, inyuñ idi efen ke ekikere?
- 6 Didie ke andidiok añwana ndinam man idomo osim owo?
- 7 Nte ikpe obiomi nnyin ke ikọde ndiọi ekikere ibon ke esit nnyin?
- 8 Nso utọ ñwed ke ana ete anditiene-Christ esin ifik okot?
- 9 Nte Ñwed Abasi osuk akaka iso ọnọ eti item abaña nte ekpedude uwem nte anditiene-Christ ke obufa eyo emi? Nam ibọrọ fo añwaña.
- 10 Nso ke afo ọfiok abaña eti ido? Kabare se edisana ido ye unen-ikpe ọwọrọde.